

ಪೇತ್ರನು ಬರೆದ ಮೊದಲನೆಯ ಪತ್ರ ಪೇತ್ರಾನಿ ಲಿವ್‌ಲ್ಯಾಲ ಪೈಲ ಪತ್ರ ವಳಕ್

ಪೇತ್ರಾನಿ ಲಿವ್‌ಲ್ಯಾಲ ಪೈಲ ಪತ್ರ ಅಪೊಸ್ತಲ್ ಜಾಲ್ಯಾಲ್ಯಾ ಪೌಲಾನಿ ಲಿವ್‌ಲ್ಯಾ ಪೇತ್ರಾನಿ ಹ್ಯ ಪತ್ರ ಸುವಾರ್ತ್ ಕರ್ತಾನಾ ಆಪ್ಲು ಕೊನ್ ಆನಿ ಕುನಾಲಾ ಲಿವ್ಲೊ ಮನ್ವುನ್ ಸಾಂಗಲ್ಯಾ ತ್ಯನಿ ಹ್ಯ ಪತ್ರ ವಳಕ್ ನಸ್‌ಲ್ಯಾಲಿ ಮನ್ವುನ್ ತ್ಯನಿ ಹಾಕಟಾನಾ ಕ್ರಿಸ್ತ್ ಇಸ್ವಾಸಿನಾ ಲಿವ್‌ಲ್ಯಾ 1:1,1:17,2:1 ಆಪಲ್ಯಾ ವಾಚಿವತ್ಯಾಲ್ಯಾನಾ ಖುಬ್ ಪಾವ್ಟಿ ಹೆ ತರನಿ ಹಾಕಟೊ ಕಾ ಮಂಜೆ ತಿ ಸಗ್ಳಿ ದುಸ್ರೆ ದುಸ್ರೆ ದೆಶೆತ್ ಪಗಳುನ್ ಗಿಲ್ತಿತ. ಕಾ ಮಂಜೆ ಹ್ಯ ಪತ್ರ ಪೌಲಾನಿ ಕಸ್‌ಲ್ಯಾನಾ ಲಿವ್‌ಲ್ಯಾ ಪತ್ರ್‌ಚೆ ರಿತುಸ್ ಖುಬ್ ಗುಶ್ಟಿ ಸಾಂಗ್ತ. ಖುಬ್ ಲೊಕ ಪೇತ್ರಾನಿ ಲಿವ್‌ಲ್ಯಾಲ ಪೈಲ ಪತ್ರ ಎಫೆಸಾನಾ ಲಿವ್‌ಲ್ಯಾಲ್ಯಾ ಪತ್ರ್‌ಚೆ ನಂತರ್ ಮಂಜೆ ಕ್ರಿಸ್ತ್ ಜಲ್ಮುನ್ ಜವ ಜವಳ್ 65 ವರ್ಸಾತ್ ಲಿವ್‌ಲ್ಯಾ ಮನ್ವುನ್ ಇಸ್ವಾಸ್ ಥೆವತ್ಯಾತ್. ಪೇತ್ರಾನಿ ಹ್ಯ ಪತ್ರ ಆಪ್ಲು ಬಾಬಿಲೊನ್ ಮನ್ವುನ್ ಹಾಕಟ್ಯಾಲ್ಯಾ ರೊಮ್ ಪೆರತ್ ಲಿವ್‌ಲ್ಯಾ 5:13

ಪೇತ್ರಾನಿ ತುಮಾನಾ ಉಮೇದ್ ದಿಯಾ ಆನಿ ಹ್ಯ ಖರ್ಚ್ಯಾ ದೇವಾಚಿ ಕ್ರಪಾ ಮನ್ವುನ್ ಆನಿ ಸಾಕ್ಷಿ ದಿಯಾ ಮನ್ವುನ್ ಸಾಂಗ್‌ತ್ಯಾಲ್ಯಾನಿ ಆಪ್ಲು ಲಿವ್‌ಲ್ಯಾಲ್ಯಾ ಪತ್ರ್‌ಚ್ಯಾ ಉದೇಶ್ ದಾವುನ್ ದೆತೊ 5:12

ಭಾಗ್

1. ಪೆತ್ರಾ ಆಪ್ಲಿ ವಳಕ್ ಕರುನ್ ದೆತೊ ಆನಿ ಆಪ್ಲಿ ವಾಚಿವತ್ಯಾಲಿ ಲೊಕ ಕೊನ್ ಮನ್ವುನ್ ದ್ಯಾವತೊ 1—2
2. ತಿಸಿ ತ್ಯೊ ಸಗ್ಳಾಂಚಾನಿ ವಾಟ್ನಿ ಗೆತಲ್ಯಾಲ ವ್ಹವುನ್ ಹುತ ರಾಖಾಯಾ ಸಾಟಿ ತ್ಯಂಚಾ ಜಿವಾಚಾ ದೆವಾಲಾ ದನ್ಯವಾದ್ ಕರ್ತೊ 1:3—2:10

3. ಮಂಗೆ ತ್ಯೊ ಹೆ ಜಗತಿತ್ ಇಸ್ವಾಸಿಂಚಾನಿ ಕಸಾ ಜಿವ್ನಾ ಕರಾಚಾ ಆನಿ ಲ ಸಂದರ್ಬಾಂಚೆ ಗುಸ್ಪಿತ್ಲಿ ಮಂಜೆ ನವರಾ ಬ್ಯಾಯ್ಕೊ ಗುಲಾಮ್ ದನ್ನಿ ಆಸಲ್ಯಾ ಗುಸ್ಪಿಶಾರಕ್ಯಾ ಸುಸ್ನಾ ದೆತೊ2:11—4:11

4. ಮಂಗೆ ಪೆತ್ರಾ ತರಾಸ್ ಯತಾನಾ ಸಮಾದಾನಾನಿ ರಾಹ್ಯಾ ಉಮೆದ್ ದೆತೊ4:12—5:11
ಹಿತ ತ್ಯೊ ಆಪ್ಲ ಪತ್ರ ಸಪಿವ್ತೊ5:12-14

1 ಯೇಸು ಕ್ರಿಸ್ತಾಚಾ ಅಪೊಸ್ತಲ್ ಜಾಲ್ಯಾಲ್ಯಾ ಪೇತ್ರಾನಿ, ಪೊಂತ, ಗಲಾತ್ಯ, ಕಪ್ಪದೊಕ್ಯ, ಆಶಾ, ಭಿಥುನ್ಯ ಮಂಥ್ಯಾಲೆ ಸೀಮತ್ಲಿ ಪಗ್ಳುನ್ ಗೆಲ್ಯಾಲ್ಯಾ ಪರದೇಸಿ ಜಾಲ್ಯಾಲಿ ದೇವಾಚಾ ಲೊಕಾನಾ ಮಂಜೆ,

2 ಪವಿತ್ರಾತ್ಮಾನಿ ನಿವಡ್‌ಲ್ಯಾಲಿ ವ್ಹಪುನ್, ಐಕಾಯಾವ್ಹಯಿ ಮನ್ವುನ್, ಯೇಸು ಕ್ರಿಸ್ತಾಚಿ ರಗಾತ್ ಸಿಪ್ರುನ್, ಬಾ ದೇವಾಚಾ ಭವಿಶಾಚಾ ಗಿನ್ಯಾನಾನಿ ನಿವಡ್‌ಲ್ಯಾಲ್ಯಾನಾ ಲಿವಾಚ್ ಕ್ಯಾ ಮಂಜೆ ತುಮನಾ ಕ್ರಪಾ ಥಂಡ್ಪನ್ ಖುಬ್ ವ್ಹಪುನಿ.

ಎಕ್ ಮೂಟೆ ಆಶಾ

3 ಆಮಚಾ ಪ್ರಭು ಯೇಸು ಕ್ರಿಸ್ತಾಚಾ ಬಾ ದೇವ್ ಜಾಲ್ಯಾಲ್ಯಾಲಾ ಸ್ತೊತ್ರ ವ್ಹಪುನಿ. ತ್ಯನಿ ಯೇಸು ಕ್ರಿಸ್ತಾಲಾ ಮೆಲ್ಯಾಲ್ಯಾತ್ಲಿ ಉಟಿವಲ್ಯಾಲ್ಯಾತ್, ಆಪ್ಲೆ ಮೊಟೆ ಕರ್ನಾನಿ ಆಮಾನಾ ಪರ್ತುನ್ ಜಗ್ಗಾರಿ ಕರುನ್ ಪರ್ತುನ್ ಜಲ್ಲದಿವುನ್ ಜೀವಾಚಿ ಆಶಾ ಆಮ್ಚಿಪ ವಾಡ್ಪುನ್,

4 ಆಮಾನಾ ನಾಹಿಸ, ಕಳಂಕಾ, ನಾಸ್ ನಸ್ಸಾರಾ ಹಾಕ್ ಮೊರ್ದು ಬಗ್ಗಾರಿ ಕಿಲಿತ. ತ್ಯೊ ಹಾಕ್ ತುಮ್ಮಿ ಸಾಟಿ ಸ್ವರ್ಗಾತ್ ಥೆವ್‌ಲ್ಯಾ

5 ಸರ್ತ್ಯಾಕಾಲಾತ್ ದಿಸಾಯಾ ತಯಾರ್ಜಾಲ್ಯಾಲಿ ರಕ್ಷನ್ ಇಸ್ವಾಸ್ ಥೆವ್ನಾರ್ ತುಮಾನಾ ಗಾವ್ತಾಯಾ ವ್ಹಯಿ ಮನ್ವುನ್ ದೇವ್ ತುಮಾನಾ ಆಪ್ಲ್ಯಾ ಬಳಾನಿ ರ್ಯಾಕ್ಸಾರ್.

6 ಆನಿ ತುಮಿ ಥೊಡ ದಿಸ್ ಗರಜ್ ಆಲಿತ ತರ ತರಚಾ ತರಾಸಾತ್ಲಿ ದುಖ್ ಜಾಲತರಿ ಸಂತೊಶಾನಿ ಹಾಸಾ.

7 ನಾಸ್ ವಹ್ಯಾಲ, ಇಸ್‌ತ್ಯಾತ್ ಕಡಿವಲ್ಯಾಲ್ಯಾ ಸೊನ್ಯಾನ್ನಿ ಖುಬ್ ಕಿಮ್ತಿಚಾ ತುಮಚಾ ಇಸ್ವಾಸ್ ಹ್ಯಾ ಕಷ್ಟಾತ್ ಪಾರ್ಕುನ್ ಯೇಸು ಕ್ರಿಸ್ತ ದಿಸ್ತಾನಾ ತುಮಾನಾ ವಹ್ಯಾಳ್ ಮರ್ಯಾದ್, ಮೈಮಾ ಆನಾರ ಜಾಲ್ಯಾ.

8 ತುಮಿ ತ್ಯಲಾ ಡೊಳ್ಳಾನಿ ಬಗ್ಲಾ ನಸ್ಲಾಸಾತರಿ ತ್ಯಚಿ ಮಾಯಾ ಕರ್ತಾಸಾ. ತುಮಿ ಆತಾ ತ್ಯಲಾ ಬಗ್ಲಾ ನಸ್ಲಾಸಾತರಿ ತ್ಯಚಿವ ಇಸ್ವಾಸ್ ಥಿವುನ್, ತುಮ್ಚಾ ಇಸ್ವಾಸಾಚ್ ಸರ್ತ ಫಳ್ ಜಾಲ್ಯಾಲ್ಯಾ ಆತ್ಮಾಚಿ ರಕ್ಯನ್ ಗೆನಾರಿ ವ್ಹಪುನ್ ಸಾಂಗಾಯಾ ವ್ಹಯಿತ್ನಾಹಿ ತಸ್ಲೆ ಮೈಮಾಚಾ ಸಂತೊಶಾನಿ ಹಾವ್ನಿ ವ್ಹತಾಸಾ.

9 ತುಮ್ಚಾ ಇಸ್ವಾಸಾಚ್ ಸರ್ತ ಫಳ್ ಜಾಲ್ಯಾಲ್ಯಾ ಆತ್ಮಾಚಿ ರಕ್ಯನ್ ಗೆನಾರಿ ವ್ಹಪುನ್ ಸಾಂಗಾಯಾ ವ್ಹಯಿತ್ನಾಹಿ ತಸ್ಲೆ ಮೈಮಾಚಾ ಸಂತೊಶಾನಿ ಉಲಾಸ್‌ವ್ಹತೊ.

10 ದೇವಾನಿ ತುಮನಾ ದ್ಯಾವ್‌ಲ್ಯಾಲೆ ಕ್ರಪಾಚೆ ಗುಸ್ತಿತ್ ಆಂದಿಸ್ ಸಾಂಗಲ್ಯಾಲ್ಯಾ ಪ್ರವಾದಿಂಚಾನಿ ಹೇ ರಕ್ಯನಾಚೆ ಗುಸ್ತಿತ್ ಶಾರ್ಕಾ ಇಚಾರ್ಕರುನ್ ಶೊದ್ಲೆ.

11 ಆಪ್ಲಿಪ ಆಸ್‌ಲ್ಯಾಲ ಕ್ರಿಸ್ತಾಚ್ ಆತ್ಮ ಕ್ರಿಸ್ತಾಲಾ ಯಯಾ ವ್ಹಯಿಜಾಲ್ಯಾಲ ತರಾಸ್ ತ್ಯಾ ನಂತರ್ ಗಾವ್ನಾರಿ ಮೈಮಾ ಆಂದಿಸ್ ಸಾಂಗ್ಲಿ ತವಾ ತ್ಯೊ ಕಚಾ ಯೊಳ್ ನಾಹಿತ ಕಸ್ಲಾ ಯೊಳ್ ದ್ಯಾವ್ನಾರ್ ಮನ್ವುನ್ ತ್ಯಂಚಾನಿ ಇಚಾರ್ ಕೆಲಾ.

12 ಫನ್ ಹ್ಯಾ ಗುಸ್ತಿ ಆಂದಿ ಸಾಂಗ್‌ಲ್ಯಾಲ್ಯಾನಿ ಆಪ್ಲಿ ಸಾಟಿ ನವ್ವ ತುಮ್ಚಿ ಸಾಟಿಸ್ ಸೇವಾ ಕರ್ನಾರ ಜಾಲ್ಯಾತ ಮನ್ವುನ್ ತ್ಯನಾ ದಿಸಲ್ಯಾ ತ್ಯಂಚಾನಿ ಆಂದಿ ಸಾಂಗಲ್ಯಾಲ್ಯಾ ಗುಶ್ಟಿಸ್ ಆತಾ ಗಡ್‌ತ್ಯಾತಾ ಮಂಥಾಲಿ ಖಬರ್ ಸ್ವರ್ಗಾತ್ಲಿ ಆಲ್ಯಾಲ್ಯಾ ಪವಿತ್ರಾತ್ಮಾಚಾ ಬಳಾನಿ ತುಮಾನಾ ಬರಿ ಖಬರ್ ಸಾಂಗ್‌ಲ್ಯಾಲ್ಯಾನಿಸ್ ತುಮಾನಾ ಮುಟಿ ಕೆಲ್ಯಾತ. ದೇವ್ದತ್ ಹ್ಯಾ ಗುಸ್ತಿ ಲಕ್ಷಾ ಥಿವುನ್ ಬಗಾಯಾ ವ್ಹಯಿ ಮನ್ವುನ್ ಮನ್ ಕರ್ತ್ಯಾತ.

ಪರಿಶುದ್ಧ ಜೀವ್ನಾಲಾ ಹಾಕಟ್‌ಲ್ಯಾಲ

13 ಮನ್ವುನ್ ತುಮಿ ತುಮಚ್ ಮನ್ ಗಟ್ ಕರುನ್, ಚಾಂಗಲ್ಯಾ ಮನಾಚ್ ವ್ಹವುನ್ ಯೇಸು ಕ್ರಿಸ್ತ ದಿಸ್ತಾನಾ ತುಮಾನಾ ಗಾವ್ನಾರೆ ಕ್ರಪೆವ್ ತುಮ್ಮಿ ಪುರಿ ಆಶಾ ಥೆವಾ.

14 ಶಾನ್ಯಾ ಪೊರಾಂಚೆಗತ್ ಚಾಲಾ, ಗಿನ್ಯಾನ್ ಯಯಾಚೆ ಆಂದಿ ತುಮಾನಾ ಆಸ್‌ಲ್ಯಾಲೆ ಬುರ್ಸೆ ಆಶೆಚೆಗತ್ ಆಘುನ್ ಚಾಲಾಚೆ ಆಂದಿ,

15 ತುಮಾನಾ ಹಾಕಟ್ನಾರಾ ನಿರ್ಮಳ್ ಹಾ ತಸಾಸ್ ತುಮಿ ಐಕುನ್ ತ್ಯಲಾ ತುಮ್ಮೆ ಸಗ್ಳೆ ಚಾಲ್ತುಕಿತ್ ಪರಿಶುದ್ಧ್ ವ್ಹವಾ.

16 ಕಾ ಮಂಜೆ, ಮೀ ಪರಿಶುದ್ಧ್ ಹಾ ತಸಾಸ್ ತುಮಿ ಪರಿಶುದ್ಧ್ ವ್ಹಯಾ ವ್ಹಯಿಸಾ ಮನ್ವುನ್ ಪವಿತ್ರ ಗ್ರಂಥಾತ್ ಲಿವ್‌ಲ್ಯಾನವ್ಚ್

17 ಪರ್ತೆಕಾಚಿ ಚಾಲ್ತುಕ್ ಬಗುನ್ ಬೆದ್ ಬಾವ್ ನಸ್ತಾನಾ ತೀರ್ಮಾನ್ ಕರ್ನಾರ್ಯಾಲಾ ತುಮಿ ಬಾ ಮನ್ವುನ್ ಹಾಕಟ್ನಾಸಾ ಮನ್ವುನ್ ಹ್ಯಾ ಲೊಕಾತ್ಲ ತುಮಚ್ ಪರವಾಸಾಚ್ ದಿಸ್ ಭ್ಯಾನ್ ಭಕ್ತಿನ್ ಗಾಲಾ.

18 ತುಮ್ಮಾ ವಡ್ಲಾಂಚಾಪ್ಪಿ ಆಲ್ಯಾಲ ಉಗಚೆ ಪದ್ಧತಿಚೆ ಚಾಲ್ತುಕಿನಿ ತುಮಾನಾ ಸುಟ್ಕುಕ್ ಕೆಲ್ಯಾಲಿ ಸೊನ್ ಚಾಂದಿ, ಖುಬ್ ತರಚಾ ನಾಸ್ ವ್ಹನಾರ್ಯಾಸಾಮಾನಾಚಾಂನಿನವ್ಚ್

19 ಯೇಸು ಕ್ರಿಸ್ತ ಮಂಥ್ಯಾಲ್ಯಾ ನಿರ್ದೋಷಿ, ನಿರ್ಮಳ್ ಜಾಲ್ಯಾಲ್ಯಾ ಮೆಂಡಾಚಾ ಪೊರಾಚಾ ಕಿಮ್ಮಿಚಾ ರಕ್ತಾನಿಸ್ ಮನ್ವುನ್ ತುಮಾನಾ ರಾವ್ ಹಾ ನವ್ಚ್

20 ತ್ಯೊ ದುನ್ಯಾ ಉತ್ಪನ್ ವ್ಹಯಾಚೆ ಆಂದಿಸ್ ನಿವ್ಡುನ್ ಹ್ಯಾ ಸರ್ತ್ಯಾ ಕಾಲಾತ್ ತುಮ್ಮಿ ಸಾಟಿ ದಿಸ್ಲಾ

21 ತ್ಯಲಾ ಮೆಲ್ಯಾಲ್ಯಾತ್ಲಿ ಉಟ್ಕುನ್ ತ್ಯಲಾ ಮೈಮಾ ದಿಲ್ಯಾಲ್ಯಾ ದೇವಾಪ ತುಮಿ ತ್ಯಚಿಸ್ಲಾಗುನ್ ಇಸ್ವಾಸ್ ಥೆವ್ಕಾರಿ ಜಾಲ್ಯಾಸಾ ತ್ಯವ್ಡಿಸ್. ಮನ್ವುನ್ ತುಮಚಾ ಇಸ್ವಾಸ್ ಆಶಾ ದೇವಾಪಸ್ ಹಾ.

22 ತುಮಿ ಖರ ಐಕುನ್ ತುಮ್ಮಿ ಆತ್ಮ ನಿರ್ಮಳ್ ಕರುನ್ ಗೆತಲ್ಯಾಸಾ ಮನ್ವುನ್ ಕಪಟ್ ನಸ್‌ಲ್ಯಾಲ್ಯಾ ಬಾವ್ಲಾಚಿ ಮಾಯಾಕರಾ. ಆಸ ಆಸ್ಲಾನಾ ಯಕಾ ಮಕಾಲಾ ನಿರ್ಮಳ್ ಮನಾನಿ, ಪುರ್ಯಾ ಮನಾನಿ ಮಾಯಾ ಕರಾ.

23 ಕಾ ಮಂಜೆ ತುಮಿ ನವಿನಿ ಜಲಾಮಲ್ಯಾಲಿ ನಾಸ್ ವ್ಹನಾರಿ ವಾಕ್ಯಾನಿ ನವ್ವ ಫನ್ ನಾಸ್ ವ್ಹಯಿ ನಸ್ಸಾರೆ ವಾಕ್ಯಾನಿಸ್. ತೀ ಖಾಯಿಮ್ ಜೀವ್ ಆಸ್ಸಾರೆ ದೇವಾಚೆ ವಾಕ್ಯಾಸ್ ಲಾಗುನ್ ಗಾವ್ಪಿ.

24 ಕಾ ಮಂಜೆ ಪವಿತ್ರ ಪುತಿಕಾತ್ ಲಿವ್‌ಲ್ಯಾ ಶಾರ್ಕ:

ಮಾನ್ಸ ಸಗ್ಳಿ ಗವ್ತಾಚೆಗತ್ ಹಾತ.

ತ್ಯಂಚಿ ಮೈಮಾ ಗವ್ತಾಚಾ ಪುಲಾಚೆಗತ್ ಹಾ.

ಗವಾತ್ ವಾಳುನ್ ಜಾನಾರ್ ತ್ಯಚ್ ಪುಲ್ ಪಡುನ್ ಜಾನಾರ್.

25 ಫನ್ ಪ್ರಭುಚಿ ಬುಲಿ ಖಾಯಿಮ್ ರಾನ್ಹಾರ್.

ತಿ ಬುಲಿ ಕಚಿ ಮನ್‌ಲ್ಯಾವ ತುಮಾನಾ ಸಾಂಗ್‌ಲ್ಯಾಲೆ ಬರೆ ಖಬ್ರಿಚ್ ವಾಕ್ಯಾಸ್.

2

ಪವಿತ್ರ ಲೊಕ ಆನಿ ಜೀವ್ ಆಸ್ಸಾರಾ ದೊಂಡಾ

1 ಮನ್ಹುನ್ ಸಗ್ಳೆ ಬುರ್ಸ ಫನ್, ಸಗ್ಳಾ ಮೊಸ್, ಕಪಟ್ಟನ್, ಖೊಟಪನ್, ಸಗ್ಳೆ ತರಚಾ ನಿಂದಾ ಸುಡುನ್ ದೆವಾ.

2 ನವಿನಿ ಜಲಾಮಲ್ಯಾಲ್ಯಾ ಮುಲಾಂಚೆಗತ್ ತುಮಿ ದೇವಾಚಿ ವಾಕ್ಯಾ ಮಂಥ್ಯಾಲ ನಿರ್ಮಳ ಆತ್ಮಿಕ್ ದುದಾಚಿ ಆಶಾ ಕರಾ. ತ್ಯನಿ ರಕ್ಷನೆತ್ ವಾಡ್ತಲಾ.

3 ಕಾ ಮಂಜೆ ಪ್ರಭು ದಯಾ ಆಸ್ಸಾರಾ ಮನ್ಹುನ್ ತುಮಾನಾ ಆನೊಭವ್ ಜಾಲ್ಯಾ.

4 ತುಮಿ ಜೀವಾಚಾ ದೊಂಡ್ಯಾಪ ಆಲ್ಯಾಸಾ. ತ್ಯೊ ದೊಂಡಾ ಲೊಕಾನಾ ನಕೊಜಾಲಾ ಫನ್ ತ್ಯೊ ದೇವಾನಿ ನಿವಡ್‌ಲ್ಯಾಲಾ ಆನಿ ತ್ಯಲಾ ಕಿಮ್ತಿಚಾ ಜಾಲ್ಯಾ.

5 ತುಮಿ ಸಾಯಿತ್ ಜೀವಾಚಾ ದೊಂಡಾ ವ್ಹವುನ್ ಆತ್ಮಿಕ್ ದಿವುಳ್ ವ್ಹಯಾ ಬ್ಯಾಂತ್ಯಾಲಿ ಹಾಸಾ. ಯೇಸು ಕ್ರಿಸ್ತಾಸ್ ಲಾಗುನ್ ದೇವಾಲಾ ಪಾಯ್ತತ್ಯ ಆತ್ಮಿಕ್ ಯಜ್ಞ ದಿಯಾ ಪವಿತ್ರ ಯಾಜಕಾಚೆಗತ್ ಹಾಸಾ.

6 ಬಗಾ, ಚೀಯೊನಾತ್ ಕೊನ್ಯಾಚಾ ದೊಂಡಾ ಥೆವ್ತೊ.

ತೋನಿವಡಲ್ಯಾಲಾ ಆನಿ ಖುಬ್ ಕಿಮ್ತಿಚಾ.

ತೃಚಿವ ಇಸ್ವಾಸ್ ಥೆವ್ನಾರ್ಚ್ಯಾಚಿ ಹಿರ್ಮಟ್ನಾ ವ್ಹನಾರುಸ್ ನಾಹಿ
ಮನ್ವುನ್ ಪವಿತ್ರ ಪುತಿಕಾತ್ ಲಿವ್ಲ್ಯಾ

7 ಮನ್ವುನ್ ಇಸ್ವಾಸ್ ಥೆವ್ನಾರ್ಚ್ಯಾ ತುಮಾನಾ ಹ್ಯೊ ದೊಂಡಾ ಕಿಮ್ತಿಚಾ.
ಫನ್ ಇಸ್ವಾಸ್ ನಸ್ನಾರ್ಚ್ಯಾನಾ,
ಘರ್ ಬ್ಯಾನಾರ್ಚ್ಯಾನಿ ನಕೊ ಮನ್ವುನ್ ಟ್ಯಾಕ್‌ಲ್ಯಾಲಾ ದೊಂಡಾಸ್
ಕೊನ್ಯಾಲಾ ಮುದಮ್ ವ್ಹಯಿ ಜಾಲ್ಯಾ

8 ಆನಿ ಪವಿತ್ರ ಗ್ರಂಥಾತ್ ಆನಿ ಯಕಿಕ್ಡ್ ಲಿವ್ಲ್ಯಾಲ ಕ್ಯಾ ಮಂಜೆ,
ತೋಲೊಕಾನಾ ರ್ಯಾಸ್ ಲಾಗತ್ಯಾಲಾ ದೊಂಡಾ
ಪ್ಯಾಡತ್ಯಾಲಿ ದೊಂಡ್.

ತೃಂಚಾನಿ ದೇವಾಚಿ ಸಬ್ಬಿ ಐಕ್ಲನಾಹಿತ ಮನ್ವುನ್ ರ್ಯಾಸ್ ಲಾಗುನ್
ಪಡತ್ಯಾತ. ತೃಚಿ ಸಾಟಿಸ್ ತೃನಾ ನಿವಡ್‌ಲ್ಯಾತ.

9 ತುಮಾನಾ ಆಂದಾರಾತ್ನಿ ಆಪ್‌ಲ್ಯಾ ಮೊಟ್ಯಾ ಉಜೀಡಾತ್
ಹಾಕಟ್‌ಲ್ಯಾಲ್ಯಾಚಿ ಚಾಂಗ್ಲಿ ಕಾಮ ಸಾಂಗಾಯಾ ತುಮಿ ದೇವಾಪ್ಪಿ
ನಿವಡ್‌ಲ್ಯಾಲಿ ಲೊಕ ರಾಜಾಚಾ ವಂಶಾತ್ಲ ಯಾಜಕ್, ನಿರ್ಮಳ್ ಲೊಕ,
ದೇವಾಚಿ ಸ್ವತಾಚಿ ಪೊರ ಜಾಲ್ಯಾಸಾ.

10 ಆಂದಿ ತುಮಿ ದೇವಾಚಿ ವ್ಹಪುನ್ ನವ್ತಾಸಾ. ಆತಾತರಿ ತುಮಿ
ದೇವಾಚಿ ಲೊಕ ಜಾಲ್ಯಾಸಾ. ಆಂದಿ ತುಮಿ ಕರ್ನಾ ನಸ್‌ಲ್ಯಾಲಿ
ಜಾಲ್ಯಾಸಾ. ಆತಾತರಿ ಕರ್ನಾ ಗೆತಲ್ಯಾಲಿ ಜಾಲ್ಯಾಸಾ.

ದೇವಾಚಿ ಗುಲಾಮ್

11 ಮಾಯೆಚಾನು, ಪ್ರವಾಸಿ ಆನಿ ದುಸರೆ ದೇಶೆಚಿ ಜಾಲ್ಯಾಲಿ ತುಮಿ
ತುಮ್ಮಾ ಆತ್‌ಮ್ಯಾಚೆ ಆಡ್ಖೆ ಲಡ್ನಾರ ಶಾರೀರಿಕ್ ಬುರ್ಸೆ ಆಶೆತ್ಲಿ ದುರ್
ರಾಹ್ಯಾ ವ್ಹಯಿಸಾ ಮನ್ವುನ್ ಮೀ ತುಮ್ಮಿಪ ಮಾಕ್ತೊ.

12 ತುಮಚಿ ವಾಗ್ನು ದುಸರ್ಯಾ ಲೊಕಾಂಚೆ ಮೊರ್ಡ್ಲ ಚಾಂಗ್ಲಿ
ರಾಹುನಿ, ತವಾ ತೀ ಕಚೆ ಗುಸ್ವಿಸ್ಲಾಗುನ್ ತುಮಾನಾ ಬುರ್ಸಿ ಮನ್ವುನ್
ನಿಂದಾ ಕರ್ತ್ಯಾತ ತೇ ತುಮ್ಮೆ ಗುಸ್ವಿತುಸ್ ತುಮ್ಮಿ ಚಾಂಗಲಿ ಕಾಮ

ಡೊಳ್ಳಾನಿ ಬಗುನ್ ತ್ಯಚಾ ಯಯಾಚಾ ದಿಸಾತ್ ತೀ ದೇವಾಲಾ ವವ್ಯಾಳ್ತಾರ್.

13 ಮಾನ್ಸಾನಿ ನಿವಡ್ಲ್ಯಾಲ್ಯಾ ಪರ್ತೆಕ್ ಅಧಿಕಾರಾಲಾ ಪ್ರಭುಸ್ ಲಾಗುನ್ ತುಮಿ ಐಕಾ. ಸರ್ವಾ ಅಧಿಕಾರ್ ಆಸ್ಲ್ಯಾಲ್ಯಾ ರಾಜಾಲಾ ವ್ಹವುನಿ

14 ನಾಹಿತ ರಾಜಾಪ್ಪಿ ಬುರ್ಸಿ ಚಾಲ್ತಾರ್ಚಾನಾ ಶಿಕ್ಷಾದಿಯಾ ಚಾಂಗ್ಲಿ ಚಾಲ್ತಾರ್ಚಾನಾ ಉಮೇದ್ ದಿಯಾ ಲಾವುನ್ ದಿಲ್ಯಾ ಅಧಿದತಿ ವ್ಹವುನಿ ತುಮಿ ತ್ಯಚಿ ಐಕಾ.

15 ಸಮಜಾಚೆ ಆಂದಿ ಬೊಲ್ತಾರ್ಚ್ಯಾ ಖುಳ್ಕಾ ಲೊಕಾಂಚಿ ಥಾವ್ನ್ಡ್ ತುಮಿ ಚಾಂಗಲ್ಯಾ ಚಾಲನ್ಯಾನಿ ಆವ್ಡಾಯಾವ್ಡಯಿ ಮನ್ಶುನ್ ದೇವಾಚಿ ಮನ್.

16 ಸ್ವತಂತ್ರಾಚೆಗತ್ ಚಾಲಾ, ಫನ್ ಬುರ್ಸಿ ಫನ್ ಆಡಶಾ ಕರಾಯಾ ತುಮಿ ಸ್ವತಂತ್ರ ವಾಪು ನಕೊಸಾ, ಫನ್ ತುಮಿ ದೇವಾಚಾ ಗುಲಾಮಾಚೆಗತ್ ಚಾಲಾ.

17 ಸಗ್ಳಾಚಾ ಮರ್ಯಾದ್ ದೇವಾ. ಬನ್ವಿ ಬಾವ್ಡಾಚಿ ಮಾಯಾ ಕರಾ. ದೇವಾಲಾ ಭೇವಾ. ರಾಜಾಲಾ ಮರ್ಯಾದ್ ದೇವಾ.

ಕ್ರಿಸ್ತಾಚೆ ಸೇವೆಚಾ ಆರ್ತ್

18 ಸೇವಕಾನು, ತುಮ್ಮಾ ದನ್ಯಾಂಚಾನಿ ಸಾಂಗಲ್ಯಾಲ ಪುರೆ ಮರೆದಿನಿ ಕರಾ. ಚಾಂಗಲ್ಯಾ ಮನಾಚಿ ಆಸಲ್ಯಾಲ್ಯಾನಾ ತ್ಯವ್ಡ್ ನವ್ವ ಕಟುರ್ ಮನಾಚಾಂಚಿ ಐಕಾ.

19 ಯಕಾಲಾ ಅನ್ಯಾಯಾನಿ ತರಾಸ್ ವ್ಹತಾನಾ ದೇವ್ ಬಕ್ಸೊ ಮನ್ಶುನ್ ಸಮಜುನ್ ತ್ಯೊ ತರಾಸ್ ತ್ಯನಿ ಸುಸ್ಪುನ್ ಗೆತಲ್ಯಾವ ತ್ಯ ಬರ.

20 ಭುಕ್ ಕರುನ್ ಮಾರ್ ಖಾತಾನಾ ತುಮಿ ಸುಸ್ಪುನ್ ಗೆತಲ್ಯಾವ ತ್ಯಾತ್ ಕ್ಯಾ ಮೊಟಿಫನ್? ಫನ್ ಬರ ಕರುನ್ ತರಾಸ್ ಯತಾನಾ ತ್ಯೊ ತುಮಿ ಸುಸ್ಪುನ್ ಗೆತಲ್ಯಾವ ತ್ಯೊ ದೇವಾಚಿ ಮೊರ್ಡ್ ಮೊಟಿ ಜಾಲ್ಯಾ.

21 ಹೃಚಿ ಸಾಟಿಸ್ ತುಮಾನಾ ಹಾಕಟ್‌ಲ್ಯಾತ. ಕ್ರಿಸ್ತ ಸಾಯಿತ್ ತುಮ್ಮಿ ಸಾಟಿ ತರಾಸ್ ಖಾವುನ್ ತುಮಿ ತ್ಯಚಿ ಪ್ಯಾಯಶಾರಿನಿ ಫಾಲಾಯಾ ವ್ಹಯಿಸಾ ಮನ್ಶುನ್ ವಾಟ್ ದಾವುನ್ ಗೇಲಾ

22 ತ್ಯನಿ ಕಸ್ಲಸ್ ಪಾಪ್ ಕೇಲನಾಹಿ, ತ್ಯಚಾ ತೊಂಡಾತ್ ಕಸ್ಲಸ್ ಕಪಟ್ ಫನ್ ಗಾವ್ನನಾಹಿ.

23 ಶಿವ್ಯಾದಿನಾರ್ಯಾನಾ ತ್ಯನಿ ಪರ್ತುನ್ ಶಿವ್ಯಾದಿಲ್ಯಾನಾಹಿತಾ, ತ್ಯನಿ ತರಾಸ್ ಖಾವುನ್ ಕುನಾಲಾಸ್ ಭ್ಯಾಗಾಲಾಚೆ ಆಂದಿ ಖರ್ಯಾನಿ ತೀರ್ಪ ಕರ್ನಾರ್ಯಾಲಾ ಆಪ್ಲ ಕಾಮ್ ದಿಲ.

24 ಆಮಿ ಪಾಪಾಸಾಟಿ ಮರುನ್ ನೀಯತಿಚಿ ವ್ಹವುನ್ ಜೀವ್ಪಾ ಕರಾಯಾಸಾಟಿ ತ್ಯೊ ಆಮ್‌ಚ ಪಾಪ ಆಪ್ನುಸ್ ಆಪ್ಲಿವ ಗಿಹುನ್ ಶಿಲ್ವೆವ ಮೇಲಾ. ತ್ಯಚಿವ ಬಸ್‌ಲ್ಯಾಲ್ಯಾ ಮಾರಾನಿ ಆಮಾನಾ ಬರ ಜಾಲ.

25 ತುಮಿ ವಾಟ್ ಫುಕುನ್ ಗೇಲ್ಯಾಲ್ಯಾ ಮೆಂಡ್ರಾಚೆಗತ್ ಆಸ್‌ಲ್ಯಾಲಿ. ಫನ್ ಆತಾ ತುಮಿ ಪರ್ತುನ್ ತುಮ್ಮಾ ಆತಮ್ಯಾಚಾ ಕುರ್ಬುರ್ ಜಾಲ್ಯಾಲ್ಯಾಪ ಆಲ್ಯಾಸಾ.

3

ನವ್ರಾ ಬ್ಯಾಯ್ಕೊ

1 ತೆಸ್ ತರನಿ ಬ್ಯಾಯ್ಕಾನು, ತುಮ್ಮಾ ದನ್ಕಾರಾಂಚ ಐಕಾ. ತ್ಯಾತ್ಲ ಥೊಡ ದೇವಾಚಾ ವಾಕ್ಯಾಚೆಗತ್ ಫಾಲನಾಹಿತ ತರಿ

2 ತುಮಿ ನಿರ್ಮಳ್ ವ್ಹವುನ್, ಮರೆದಿನಿ ಫಾಲತ್ಯಾಲಿ ತ್ಯಂಚಾನಿ ಬಗುನ್ ವಾಕ್ಯಾ ರಾವ್ಯಾ ನಸಲ್ಯಾತರಿ ಆಪಲ್ಯಾ ದನ್ಗರಿ ಜಾಲ್ಯಾಲ್ಯಾ ತುಮ್ಮೆ ಚಾಂಗ್ಲೆ ಚಾಲಿನಿ ಚಾಂಗ್ಲೆ ವಾಟವ ಯತಿಲ.

3 ಯನಿ ಗಾಲ್ಡುಚಿ, ಸೊನ್ಯಾಚ ದಾಗಿನ ಗಾಲಾಚ, ಕಿಮ್ಮಿಚ ಕಪ್ಪ ವಾಪ್ರಾಚ ಹ್ಯಂಚಿ ಬಾಹಿರ್ಲಿ ಸೊಬಾ ತುಮ್ಮಿ ರಾಹುನಾಹಿ.

4 ಫನ್ ದೇವಾಚೆ ನದ್ರತ್ ಕಿಮ್ಮಿಚ ಆನಿ ಖಾಯಿಮಚ ಜಾಲ್ಯಾಲ ಚಾಂಗಲ್ಯಾ ಗುನಾಚಾ ಆನಿ ಥಂಡ್ ಮನ್ ಮಂಥ್ಯಾಲ ಆತ್ಮ ಸೊನ ತುಮಚಿ ಸೊಬಾ ವ್ಹವುನಿ.

5 ಪೈಲ್ಯಾಕಾಲಾತ್ ದೇವಾವ ಇಸ್ವಾನ್ ಥೆವ್‌ಲ್ಯಾಲ್ಯಾ ಭಕ್ತಿನಿ ಸಾಹಿತ್ ಆಶಾಸ್ ಆಪ್‌ಲ್ಯಾನಾ ಸೊಬಾಕರಿತ್ಯಾ ತ್ಯಾ ಆಪ್‌ಲ್ಯಾ ಆಪ್‌ಲ್ಯಾ ಫ್ವಾಂಚಾನಿ ಸಾಂಗಲ್ಯಾಲ್ಯಾ ಐಕಿತ್ಯಾ.

6 ಸಾರಾಳ್ ತಸಿನ್ ಅಬ್ರಹಾಮಾಚೆ ಐಕುನ್ ತ್ಯಲಾ ಘೊ ಮನ್ವುನ್ ಹಾಕ್ತಿತಿ. ತುಮಿ ಚಾಂಗ್ಲೆ ಕರುನ್ ಕಸ್‌ಲ್ಯಾಸ್ ಭ್ಯಾಲಾ ಬೀಹಿತ್ಪಾಹಿಸಾತ ತುಮಿ ತಿಚಾ ಲಿಕಿ ವ್ಹಸಿಲಾ.

7 ತೆಸ್ ತರನಿ ಫ್ವಾಸಾನು, ಬ್ಯಾಯ್ಕಾಮಾನುಸ್ ತುಮ್ಮಿವ್ಚಿ ಬಳ್ಳಸ್‌ಲ್ಯಾಲ ಮನ್ವುನ್ ಸಮಜುನ್, ತುಮ್ಮೆ ದನ್ಗರಿಂಚೆ ಸಂಗ ನಾಜುಕ್ಪನಾನಿ ಚಾಲಾ, ತ್ಯಾ ಕಾಯಿಮ್ಮಾ ಜೀವಾಚಾ ವರಲಾ ತುಮ್ಮಿ ಸಂಗ ವಾರಿಸ್ ಮನ್ವುನ್ ಸಮಜುನ್ ತ್ಯನಾ ಮರೈದ್ ದೇವಾ. ಆಸ ಕೇಲ್ಯಾವ ತುಮ್ಮಾ ಮಾಗ್‌ನ್ಯಾತ್ ಆಡಚನ್ ಯಯಿತ್ಪಾಹಿ.

ನೀಯತಿಸಾಟಿ ತರಾಸ್ ಖಾಯಾಚಾ

8 ಸೇವಟ್ ತುಮಿ ಸಗ್ಳಿ ಯಕಾ ಮನಾನಿ, ಯಕಾ ಮಕಾವ ಕರ್ನಾ ದಾವಾ, ಬನ್ವಿ ಬಾವ್ವಾಚೆಗತ್ ಯಕಾ ಮಕಾಚಿ ಮಾಯಾ ಕರಾ, ಕರ್ನಾ, ಆನಿ ಮಾಯೆಚಿ ವ್ಹಪುನ್ ರಾವ್ವ.

9 ನಾಸಾಲಾ ನಾಸ್, ನಿಂದಲಾ ನಿಂದಾ ಕರಾಚೆ ಆಂದಿ ಆಶಿರ್ವಾದ್ ಕರಾ. ಹ್ಯಚಿಸಾಟಿ ದೇವಾನಿ ತುಮಾನಾ ಹಾಕಟ್‌ಲ್ಯಾ ನವ್ವ. ಆಸ ಕೇಲ್ಯಾವ ತುಮಿ ಆಶಿರ್ವಾದ್ ಪುಕಟ್ ಗೆನಾರ್.

10 ಕಾ ಮಂಜೆ ಪವಿತ್ರ ಪುತಿಕಾತ್ ಲಿವ್‌ಲ್ಯಾಶಾರ್ಕ,

ಜೀವಾಚಿ ಆಶಾ ಕರಿತ್

ಚಾಂಗ್ಲದಿಸ್ ಬಗಾಯಾ ವಾಟ್ ಬಗ್ನಾರಾ

ಬುರ್ಸ ಬೊಲಾಚೆ ಆಂದಿ

ಅಪ್ಲಿ ಜೀಬ್ ಮೊಸಾಚಾ ಬೊಲ್ಯಾ ಬೊಲಾಚೆ ಆಂದಿ ವಟ್ ಘಟ್ ದರುಂತ.

11 ತ್ಯೊ ಬುರ್ಸ ಸುಡುನ್ ಚಾಂಗ್ಲೆ ಕರುನಿ.

ಥಂಡ್ಪನಾನಿ ಆಶಿರ್ವಾದ್ ಕರುನ್ ತ್ಯಚಿ ಸಾಟಿ ಯತ್ನ ಕರುನಿ.

12 ಕಾ ಮಂಜೆ ಪ್ರಭು ನೀಯತಿಂಚಾನಾ ಬ್ಯಾನ್ವೊ

ಆನಿ ತ್ಯೊ ತ್ಯಚಾ ಮಾಗ್‌ನ್ಯಾಲಾ ಕಾನ್ ದೆತೊ.

ಫನ್ ಖೆಡಶಾನಾ ಪ್ರಭು ದುರ್ ರಾಥೊ.

13 ತುಮಾನಾ ಚಾಂಗ್ಲ ಕರಾಯಾ ಮನ್ ಆಸ್ಲತ ತುಮಾನಾ ಬುರ್ಸ ಕರ್ನಾರಾ ಕೊನ್ ಹಾ?

14 ಎಕ್ ಯಳಿ ತುಮಿ ನೀಯತಿಸ್ ಲಾಗುನ್ ತರಾಸ್ ಖಾಲ್ಯಾವ ತುಮಿ ಬರ. ತ್ಯಂಚಾ ಭ್ಯಾಲಾ ಭೀಹು ನಕೊಸಾ, ತಳ್ಳಳು ನಕೊಸಾ.

15 ಫನ್ ಕ್ರಿಸ್ತಲಾ ಪ್ರಭು ಮನ್ವುನ್ ತುಮ್ಚಾ ಮನಾತ್ ದಾವಾ. ತುಮ್ಮಿಪ್ಲೆ ಆಶೆಲಾ ಆಧಾರ್ ಕ್ಯಾ ಮನ್ವುನ್ ಇಚಾರ್ನಾರ್ಚ್ಯಾನಾ ಉತ್ತರ್ ದಿಯಾ ಕವಾಬಿ ತಯಾರ್ ರಾವ್ತಾ ಪನ್ ತ್ಯ ಚಾಂಗಲ್ಯಾ ಮನಾನಿ ಆನಿ ಮರೆದಿನಿ ಸಾಂಗಾ.

16 ಚಾಂಗಲ್ಯಾ ಮನಾಚಿ ವ್ಹವಾ ತವಾ ಕ್ರಿಸ್ತಾಪ್ಲಿ ತುಮ್ಮೆ ಚಾಂಗ್ಲೆ ಚಾಲ್ತುಕಿಚೆ ಗುಸ್ತಿತ್ ಬುರ್ಸ ಬೊಲ್ವಾರಿ ತುಮಾನಾ ನಂದಾ ಕರಾಯಾ ಲಾಜ್ವಾರ್.

17 ಬುರಶಾ ಚಾಲನ್ಯಾಚಿ ವ್ಹವುನ್ ತರಾಸ್ ಖಾಯಾಚೆ ಆಂದಿ ಚಾಂಗಲ್ಯಾ ಚಾಲನ್ಯಾಚಿ ವ್ಹವುನ್ ದೇವಾಚಾ ಮನಾ ಶಾರ್ಕಾ ತರಾಸ್ ಕಾಯಾಚಾ ಬರಾ.

18 ಕ್ರಿಸ್ತ ಸಾಯಿತ್ ನಿಯತಿಚಾ ವ್ಹವುನ್ ನೀಯತ್ ನಸ್‌ಲ್ಯಾಂಚೆ ಸಾಟಿ ಜೀವ್ ದಿವುನ್ ಆಮಾನಾ ದೇವಾಪ ಮೀಳ್ವಾಯಾ ಸಾಟಿ ಯಂಗ್ಡಾಸ್ ಪಾಪ್ ಕಾಡುನ್ ಟಾಕಾಯಾ ತರಾಸ್ ಖಾಪುನ್. ತ್ಯೊ ಶರೀರಾನಿ ಮೇಲಾ, ಆತಮ್ಯಾನಿ ಪರ್ತುನ್ ಜಿತಾಜಾಲಾ.

19 ಆನಿ ತ್ಯೊ ಆತ್ಮ್ಯಾಚಾ ರುಪಾನಿ ತುರಂಗಾತ್‌ಲ್ಯಾ ಆತ್ಮ್ಯಾಪ್ಲಿ ಜಾಪುನ್ ಬರಿ ಖಬರ್ ಸಾಂಗ್ಲೊ.

20 ಮಂಜೆ ಪೈಲ್ಯಾ ಕಾಲಾತ್ ನೊಹಾನಿ ವ್ಹಡಿ ಬ್ಯಾಂದ್ತಾನಾ ದೇವಾನಿ ಖುಬ್ ಥಂಡ್ವನಾನಿ ರ್ಚಾಕ್ಲ ತವಾ ತ್ಯಂಚಾನಿ ತ್ಯಚ ಏಕ್ಲನಾಹಿ. ತೆ ವ್ಹಡಿತ್ ಆಸ್‌ಲ್ಯಾಲಿ ಆಟ್ ಲೊಕ ತ್ಯವ್ಹಿಸ್ ಪಾನ್ಯಾತ್ಲಿ ರಾಯ್ಕಿತ.

21 ತ್ಯಾ ಪಾನ್ಯಾಚಾ ಬಾಪ್ತಿಸ್ಮಾ ಯೇಸು ಕ್ರಿಸ್ತಾಚಾ ಪುನ್‌ರುತ್ಥಾನಾಸ್ಲಾಗುನ್ ಆತಾ ಆಮಾನಾ ರ್ಚಾಕ್ಲ. ತ್ಯ ಆಂಗಾವ್ಲಾ ಮೋಳ್ ಗಾಲ್ವಾರ ನವ್ವ ಫನ್ ಚಾಂಗ್ಲಿ ಮನಾಚಿ ಸಾಕ್ಷಿ ವ್ಹಯಿ ಮನ್ವುನ್ ದೇವಾಪ ಮಾಗಾಚ್ ಜಾಲ್ಯಾ.

22 ತ್ಯೊ ಸ್ವರ್ಗಾತ್ ಜಾವುನ್ ದೇವಾಚೆ ಉಜ್ವಾಂಗ್ಣಿ ಹಾ, ದೇವ್ ದುತ್, ಅಧಿಕಾರಿ ಆನಿ ಬಳ ತ್ಯಚಾ ತಾಬ್ಯಾತ್ ಹಾತ.

4

ಜೀವ್ನಾ ಬದಾಲ್ಯಾಲಾ

1 ಕ್ರಿಸ್ತಾನಿ ಆಮ್ಚಿ ಸಾಟಿ ಆಪ್ಲ್ಯಾ ಶರೀರಾತ್ ತರಾಸ್ ಖಾಲಾ ಮನ್ವುನ್ ತುಮಿ ಸಾಯಿತ್ ತೆಸ್ ತರನಿ ತರಾಸ್ ಖಾಯಾ ತಯಾರ್ ವ್ಹವಾ. ಕಾ ಮಂಜೆ ಶರೀರಾತ್ ತರಾಸ್ ಖಾಲ್ಯಾಲಾ ಪಾಪ್ ಕರ್ತ್ಯಾಲ ಥಾಂಬಿವ್ಲ್ಯಾಲಾ ಜಾಲ್ಯಾ.

2 ಮನ್ವುನ್ ರಾಯಲ್ಯಾಲ ಅಪ್ಲಾ ಜೀವ್ ಆಸಪರತ್ ಆನಿ ಮಾನ್ವಾಚೆ ಆಶೆ ಶಾರ್ಕಾ ಜೀವ್ನಾ ಕರಾಯಾ ಯತ್ನ ಕರ್ನಾರ್.

3 ತುಮಿ ಅವಮಾನ್, ಬುರ್ಸಿ ಆಶಾ, ಪಿದೊಡಫನ್, ದೌಂದವಫನ್, ಪಿವುನ್ ಬೊಲಾಚ್, ಪಾಶಾನ್ ಪುಜಾಚಿ, ಹ್ಯ ಸಗ್ಳ ಚಾಲ್ವಾಚಾತ್ಪಿ ದುಸ್ಮರ್ತ್ಯಾ ಲೋಕಾನಾ ಆವ್ಡಸಾರಿ ಬುರ್ಸಿ ಕಾಮ ಕರ್ತ್ಯಾಲ್ಯಾತ್ ಯೊಳ್ ಕ್ಯಾಡ್ಲ್ಯಾಲಾ ಪುರ.

4 ತ್ಯಂಚಾನಿ ಕೆಲ್ಯಾಲ್ಯಾ ಖುಬ್ ಪಟಿಂಗ್ವನಾತ್ ತುಮಿ ಮಿಸಳಾಚೆ ಆಂದಿ ಹಾಸಾ ಮನ್ವುನ್ ತೀ ಆಜಾಬ್ ವ್ಹವುನ್ ತುಮಚಾ ರಾಗ್ ಕರ್ತ್ಯಾತ.

5 ತೀ ಜಿತ್ತಿ ಆಸ್ಲ್ಯಾಲ್ಯಾನಾಬಿ ಮೇಲ್ಯಾಲ್ಯಾನಾಬಿ ನ್ಯಾಯಿ ನಿವ್ಡಾಯಾ ತಯಾರ್ ಆಸ್ಲ್ಯಾಲ್ಯಾಲಾ ಉತ್ತರ್ ದಿಯಾವ್ಡಯಿ.

6 ಮೇಲ್ಯಾಲಿ ಮಾನ್ವಾಚೆ ಭಾತಿಲಾ ಯತ್ಯಾಲ್ಯಾ ಮರಾನ್ ಮಂಥ್ಯಾಲಾ ತಿರ್ಮಾನ್ ಶರೀರಾನಿ ಆಸ್ತಾನಾ ಗೆತಲ್ಯಾ ತೀ ಆತ್ಮ್ಯಾನ್ ದೇವಾಚೆಗತ್ ಜೀವ್ನಾ ಕರಾಯಾಸಾಟಿ ತ್ಯನಾಬಿ ಬರಿಖಬರ್ ಸಾಂಗ್ಲಿ.

ದೇವಾಚ್ ಜೀವಾನ್

7 ಸಗ್ಳಾಚ್ ಸರ್ತ ಜವಳ್ ಜಾಲ್ಯಾ ಮನ್ವುನ್ ತುಮಿ ಆತ್ಮಿ ತಾಬ್ಯಾತ್ ದರುನ್ ಕವಾಬಿ ಮಾಗ್ನ್ಯಾಲಾ ತಯಾರ್ ಆಸ್ಲ್ಯಾಚೆಗತ್ ಥಂಟ್ವನಾನಿ ರಾವ್ಚಾ.

8 ಸರ್ಗಾಂಚೆ ಆಂದಿ ತುಮ್ಮಾ ತುಮ್ಮಾತ್ ಇಸ್ವಾಸಾಚಿ ಮಾಯಾ ರಾಹುನಿ. ಮಾಯಾ ಖುಬ್ ಪಾಪ ಜಾಕ್ತಿ.

9 ಟುರಟುರಾಚೆ ಆಂದಿ ಯಕಾಮಕಾಚಿ ಚಾಕ್ರಿ ಕರಾ.

10 ತುಮಿ ಸಗ್ಳಿ ದೇವಾಚಾ ತರತರಚಾ ವರಾಂಚೆ ಗುಸ್ಪಿತ್ ಚಾಂಗ್ಲೆ ಪಾರ್ಕಿಚಿ ವ್ಹವುನ್ ಪರ್ತೆಕಾನಿ ಆಪ್ಲು ಗೆತಲ್ಯಾಲ ಕ್ರಪೆಚೆ ವರ್ ಸರ್ಗಾಂಚೆ ಸೇವೆತ್ ವಾಪ್ರುನಿ.

11 ಯೊಕ್ ಸಾಂಗ್ನಾರಾ ಜಾಲಾತ ದೇವಾಚಿ ವಚ್ಚ ಸಾಂಗಿತ್ ರಾಹುನಿ. ಯೊಕ್ ಸೇವಾ ಕರ್ನಾರಾ ಜಾಲಾತ ದೇವಾಚಾ ಬಳಾಶಾರ್ಕಾ ಕರುನಿ. ಹ್ಯಾ ಸರ್ಗಾಂಚಿ ಯೇಸು ಕ್ರಿಸ್ತಾಸ್ಲಾಗುನ್ ದೇವಾಲಾ ಸ್ತೊತ್ರ ವ್ಹನಾರ್. ಯೇಸುಕ್ರಿಸ್ತಾಲಾ ಮೈಮಾ ಆನಿ ಮರ್ಲ್ಯಾದ್ ಸರ್ವ್ಯಾ ಕಾಲಾತ್ ರಾನಾರ್ ತಸಸ್ ವ್ಹವುನಿ.

ಕ್ರಿಸ್ತಾಚಾ ವ್ಹವುನ್ ತರಾಸ್ ಸುಸ್ವುನ್ ಗಿಹ್ಯಾಚಾ

12 ಮಾಯೆಚಾನು, ತುಮ್ಮಿ ಪರಿಕ್ಷಾ ಕರಾಯಾ ಸಾಟಿ ಇಸ್ತ್ಯಾಂಚಿ ಪರಿಕ್ಷಾ ಯತಾನಾ ತುಮಿ ಆಜಾಬ್ ವ್ಹವು ನಕೊಸಾ. ಖುಬ್ ಗುಸ್ಪಿ ಯತಿಲಾ ಮನ್ವುನ್ ಸಮಜುನ್ ಗಿಹುನಕೊಸಾ.

13 ಫನ್ ತುಮಿ ಕ್ಯವಡ್ಯಾ ಪರತ್ ಕ್ರಿಸ್ತಾಚಾ ತರಾಸ್ ಖಾನಾರ ಜಾಲ್ಯಾಸಾ ತ್ಯವಡ್ಯಾ ಪರತ್ ಸಂತೊಸ್ ವ್ಹವಾ. ಮನ್ವುನ್ ತ್ಯಚಿ ಮೈಮಾ ದಿಸ್ತಾನಾ ತುಮಿ ಸಂತೊಸ್ ವ್ಹವಾ.

14 ತುಮಾನಾ ಕ್ರಿಸ್ತಾಚಾ ನಾವಾಸ್ ಲಾಗುನ್ ಆವ್ಮಾನ್ ವ್ಹಯಿತ್ ಆಸ್ಲಾಸಾತ ತುಮಿ ಬರ. ಮೈಮೆಚ್ ಆತ್ಮ ಜಾಲ್ಯಾಲ ದೇವಾಚ್ ಆತ್ಮ ತುಮ್ಮಿಪ ಹಾ ನವ್.

15 ತುಮ್ಮಿಪ ಕೊನ್ತರಿ ಖುನ್ಸಿ, ಚೊರ್, ನಿಚ್, ದುಸ್ಕ್ಯಾಚಾ ಕಾಮಾತ್ ಡುಯಿ ಗಾಲುನ್ ಗುನ್ವದಾರ್ ವ್ಹವುನಾಹಿ.

16 ಫನ್ ಕ್ರಿಸ್ತ ವ್ಹವುನ್ ತರಾಸ್ ಖಾಲ್ಯಾವ ತ್ಯೊ ಲಾಜಾಚೆ ಆಂದಿ ತ್ಯಾ ನಾವಾನಿಸ್ ದೇವಾಲಾ ವವ್ಯಾಳುನಿ.

17 ನ್ಯಾಯಿ ನಿವ್ವಾಚಾ ಯೊಳ್ ಆಲ್ಯಾ ತ್ಯೊ ಯೊಳ್ ದೇವಾಚಾ ಘರಾತುಸ್ ಸುರು ಜಾಲ್ಯಾ ನವ್ ತ್ಯೊ ತುಮ್ಮಿಪ ಸುರು ವ್ಹಯಾಚಾ

ಆಸ್ಥಾತ, ದೇವಾಚೆ ಬರೆ ಖಬ್ರಿವ ಇಸ್ವಾಸ್ ನಸ್‌ಲ್ಯಾಲ್ಯಾಚೆ ಸರ್ತ ಕಸ ಹಾ?

18 ನೀಯತಿಚಾ ರಕ್ಷನ್ ಗಿಹ್ಯಾಚಾ ತರಾಸ್ ಜಾಲ್ಯಾವ, ಭಕ್ತಿ ನಸ್‌ಲ್ಯಾಲ್ಯಾನಿ ಆನಿ ಪಾಪಿನಿ ರಕ್ಷನ್ ಗಿಹ್ಯಾಚೆ ಕಸ? ಮನ್ವುನ್ ವಚನಾತ್ ಲಿವ್‌ಲ್ಯಾ.

19 ಆಸ ಆಸ್ಥಾನಾ ದೇವಾಚಾ ಮನಾ ಶಾರ್ಕಾ ತರಾಸ್ ಖಾನಾರಿ ಚಾಂಗ್ಲ ಕರುನ್ ಆಪ್ಲಿ ಆತ್ಮಿ ಇಸ್ವಾಸಾಚಾ ಉತ್ಪತಿಚಾ ಪ್ರಭುಪ ದಿವುನಿ.

5

ದೇವಾಚಿ ಮೆಂಡ್ರ ರಾಕಾಚಿ

1 ಮಂಡಳಿಚಾ ಜಾಂತ್ಯಾನು, ಸಂಗಚಾ ಜಾಂತಾ ಜಾಲ್ಯಾಲಾ ಮೀ ಕ್ರಿಸ್ತಾಚಾ ತರಾಸ್ ಡೊಳ್ಳಾನಿ ಬಗ್ಲಾ, ಹಿತ್ಲಿ ಮೊರ್ದ್ ದಿಸ್ತಾರೆ ಮೈಮೆತ್ ವಾಟೆದಾರ್ ವ್ಹಪುನ್ ತುಮಾನಾ ಉಮೇದ್ ದಿವುನ್ ಸಾಂಗಾಚೆ ಕ್ಯಾ ಮಂಜೆ.

2 ತುಮಚಾ ತಾಬ್ಯಾತ್ ಆಸಲ್ಯಾಲಿ ದೇವಾಚಿ ಮೆಂಡ್ರ ರಾಖಾ. ಬಳಜುರಿನಿ ನವ್ವ ದೇವಾಚಾ ಮನಾಚೆಗತ್ ಮನ್ಲಿವುನ್ , ನೀಚ್‌ಜಾಲ್ಯಾಲ್ಯಾ ಪೈಶಾಚೆ ಆಶೆನಿ ನವ್ವ ಚಾಂಗಲ್ಯಾ ಮನಾನಿ ರಾಖಾ.

3 ತುಮ್ಚಾ ತಾಬ್ಯಾತ್ ದಿಲ್ಯಾಲ್ಯಾಂಚಿವ ಹುಕುಮ್ ಚಾಲಿವತ್ಯಾಲ್ಯಾಂಚಿಗತ್ ಕರಾಚೆ ಆಂದಿ ಮೆಂಡ್ರಾನಾ ಚಾಂಗ್ಲ ಚಾಲಾ.

4 ಪ್ರದಾನ್ ಕುರ್ಬುರ್ ದಿಸ್ತಾನಾ ತುಮಿ ಕಂದಿಸ್ ವಾಳತ್ ನಸ್‌ಲ್ಯಾಲ ಮೈಮೆಚೆ ಕಿರೀಟ್ ಗೇನಾರ್.

5 ಪ್ಯೊರ್‌ಗ್ಯಾನು, ತೇಸ್ ತರನಿ ಜಾನ್‌ತ್ಯಾಂಚೆ ಐಕಾ. ತುಮಿ ಸಗ್ಳಿ ಗರಿಬ್ ಮನಾಚೆ ಕಷ್ಟ ಗಾಲುನ್ ಯಕಾ ಮಕಾಚಿ ಚಾಕ್ರಿ ಕರಾ. ಕಾ ಮಂಜೆ ದೇವ್ ಗರ್ವಿಂಚಾ ಇರೊದ್ ಕರ್ತೊ. ಗರಿಬಾನಾತರಿ ಕ್ರಪೆ ದೆತೊ.

6 ಆಸ ಆಸ್ಥಾನಾ ದೇವಾಚಾ ಬಳಾಚಾ ಹಾತಾಚೆಕಾಲ್ ತುಮಿ ರಾವ್ವಾ ತ್ಯೊ ಶಾರ್ಕ್ಯಾ ದಿಸಾತ್ ತುಮಾನಾ ವರ್ ಆನಾರ್.

7 ತುಮ್ಚಿ ಕ್ಯಾಳ್ಜಿ ತ್ಯೆಚಿವ ಗಾಲಾ ತ್ಯೊ ತುಮ್ಚಿ ಸಾಟಿ ಕ್ಯಾಳ್ಜಿ ಕರ್ತೊ.

8 ಭಾಂಗಲ್ಯಾ ಮನಾನಿ ಭಾಗ್ಯುತ್ ರಾವ್ವಾ ತುಮಚಾ ವಾದಿ ಜಾಲ್ಯಾಲಾ ಸೈತಾನ್ ವರಾಡ್‌ತ್ಯಾಲ್ಯಾ ಸಿಂಹಾಚೆಗತ್ ಕುನಾಲಾ ಗಿಳು ಮನ್ವುನ್ ಸುದಿತ್ ಪಿರತ್ಯೊ.

9 ತುಮಿ ಇಸ್ವಾಸಾತ್ ಗಟ್ ರಾಹುನ್ ತ್ಯಲಾ ಭ್ಯಾ ಗಾಲಾ. ದರ್ತಿವ ಆಸ್‌ಲ್ಯಾಲ ತುಮಚ್ ಬಾಹು ತಸ್ಲಾಸ್ ತರಾಸ್ ಖಾತ್ಯಾತ ಮನ್ವುನ್ ತುಮಾನಾ ರಾವ ಹಾ.

10 ಕ್ರಿಸ್ತಾಪ ತುಮಾನಾ ಆಪ್ಲೆ ಖಾಯಿಮ್ಚೆ ಮೈಮೆತ್ ಹಾಕಟ್‌ಲ್ಯಾಲೆ ಕ್ರಪೆಚಾ ದೇವ್ ಆಪ್ಲುಸ್, ತುಮಿ ಥೊಡಾ ಯೊಳ್ ತರಾಸ್ ಖಾಲ್ಯಾ ನಂತರ್ ತುಮಾನಾ ಕಸ್ಲೆ ಪರಸ್ಥಿತಿತ್ ಆನುನ್ ಗಟ್ ಕರ್ನಾರ್.

11 ತ್ಯಚಾ ರಾಜ್ ಭಾರ್ ಕಂದಿಬಿ ರಾಹುನಿ. ತಸಸ್ ವ್ಹವುನಿ.

ಸರ್ತ ನಮಸ್ಕಾರ್

12 ತುಮಾನಾ ಉಮೇದ್ ದಿಯಾಲಾ ಹಿಸ್ ದೇವಾಚಿ ಖರಿ ಕ್ರಪಾ ಮನ್ವುನ್ ಸಾಕ್ಷಿ ಸಾಂಗಾಯಾಬಿ ಮೀ ಶಾರ್ಕ ಲಿವುನ್, ಇಸ್ವಾಸಾಚಾ ಬಾಹು ಮನ್ವುನ್ ಮೀ ಮಂಥ್ಯಾಲ್ಯಾ ಸಿಲ್ವಾನಾಚಾ ಹಾತಾತ್ ಹ್ಯೆ ಲಾವುನ್ಲಿಲ್ಯಾ ಹೇ ಖರೆ ಕ್ರುಪೆತ್ ಉಬಿ ರಾವ್ವಾ.

13 ದೇವಾನಿ ತುಮ್ಮಿ ಸಂಗ ನಿವಡ್‌ಲ್ಯಾಲಿ ಬಾಬಿಲೊನಾತ್ಲಿ ಮಂಡಳಿ ತುಮಾನಾ ನಮಸ್ಕಾರ್ ಕರತೆ. ಮಾಜಾ ಲ್ಯೊಕ್ ಜಾಲ್ಯಾಲಾ ಮಾರ್ಕ್ ಸಾಯಿತ್ ತುಮಾನಾ ನಮಸ್ಕಾರ್ ಕರತ್ಯೊ.

14 ಮಾಯೆನಿ ಮುಕಾ ದಿವುನ್ ಯಕಾ ಮಕಾಲಾ ನಮಸ್ಕಾರ್ ಕರಾ. ಕ್ರಿಸ್ತಾಪ ಆಸ್‌ಲ್ಯಾಲ್ಯಾ ತುಮಾನಾ ಸಗ್ಳ್ಯಾನಾ ಸಮಾಧಾನ್ ವ್ಹವುನಿ.

ದೆವಾಜಿ ಖರಿ ಕಬರ್
The New Testament in the Gowli language of India,
Devanagari script. ದೆವಾಜಿ ಖರಿ ಕಬರ್ (Bible)

copyright © 2023 The Word for the World International and Gowly Marathi Translation Samti, Karnataka

Language: (Gowli)

Contributor: The Word for the World International

ದೆವಾಜಿ ಖರಿ ಕಬರ್
ನವಾ ಕರಾರ್, 2023

The New Testament in Gowli Marathi Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

c4461ecc-9ab5-5edc-b62d-034ac186b922